



白洲集

忠

古言律詩

六

~ 16  
2388  
3



和  
2388  
8-3



白洲集卷之七



七言律

夜坐

何處逍遙一散愁  
小桃花畔月明樓  
青春興比元規淺  
白首詩如謝朓休  
萬事丘園甘寂寞  
十年塵土愧淹留  
深宵坐覺綿裘冷  
欲下疎簾露滿鉤

次江都尹東嶽傷石洲韻

石洲舊居在江都

楚獄何年劍氣消  
正聲千載已寥寥  
楓林暗處魂應返  
桃李開時恨轉饒  
塞外謾留懸榻約  
人間誰遣隔江招  
依然謝朓青山宅  
斜日淒涼照斷橋

石洲被禍時有桃花

亂落詩識故  
第四及之

挽李景三省身內

淚盡鴛原受袂初病添鸞鏡掩塵餘清門活計貧無  
賴羨對才華鬱未舒篋裏空留鍾氏訓床頭新有子  
荆書春風得意應非遠忍見殘花繞故居

戊午三月晦送姑氏至漢仍卧所乘船順流而  
下將抵楊浦新居到龍山水悍捨舟登岸在  
舟也無以遣懷誦老杜秋興八首誦罷步原  
韻時春也命曰春興無筆硯不即刪檢定多  
疵類任覽者安改

天畔青青何郡山夕嵐朝靄有無間題名石古惟封  
蘚負笈亭閑但掩關稚柳細如梳後髮殘花嬌似鏡  
中顏惟思採藥金華島換得鳴珂玉筍班

橘裏光陰一局棋人間榮落幾回悲書生志業惟三  
代聖世經綸此一時城市早知開眼少江湖還愧  
退身遲蓬窓睡起無餘事寂寞何人問所思

他時論議此時功萬事聞來酒一中落筆可容僮父  
語定交誰有古人風王孫草色傷心碧帝子花光盡  
意紅莫問蓬萊獻賦客釣魚磯上釣魚翁

十里金波漾夕暉隔江烟樹望中微蒿師運柁穿蘋

去烏鬼啣魚掠水飛岸轉洲迴新社近星離雲散故人違山童報道山家興柳眼初斜杏臉肥

何處風帆整復斜海門江口閱年華雲邊買酒傳新桶烟渚燭魚用老槎採得篁根編作笠摘來蘆葉捲成笳携君欲向巖頭寺看盡東湖十里花

江干石路細逶迤籬落蕭條傍晚陂看竹會除先病葉賞花休折後開枝回風鬧處門常掩西日烘時席屢移最愛鷗絲明似洗對君衰髻共垂垂

野老籬前榜櫟林春來枝葉亦蕭森蒼苔已蝕連旬雨翠蓋常留半卦陰早朽獨無山木壽先零誰識歲

寒心惟堪斫就長生杵日把松牋搗石砧

淒淒風日大江頭今歲暮春如仲秋明時燮理大臣在濁酒有無狂客愁高歌得意碎黃鶴浪迹忘機隨白鷗三畦種秫釀資足何用買田歸沃州

江居

花染輕霞柳拂烟竹窓蘆箔日如年東西瓜蔓山前圃大小年芽石上田繞樹漁翁朝晒網隔江樵子夜呼船倚人莫問閑中趣病起無心草太玄

奉別日本回答使從事李公 景稷

南粵連年款漢庭太中旌節過滄溟秦關舊約青山

在楚屋新盟白馬刑納納方知恢大度區區何用守  
常經臨分為贈防身劍會見龍光拂斗星  
倒盡三江萬里流難教一洒百年羞從知大漢無長  
策又見詞臣辨壯遊蓬島烟霞迎使節扶桑日月近  
仙舟他時重趙勳應爛錯料何人仰屋憂  
青春符采映仙曹湖海元龍第一豪筆陣聳如鸞鳳  
舞詩鋒瑩似鷓鴣膏身因許國輕千里髮為思親易  
二毛北斗定依南斗望白雲飛處五雲高

次東嶽韻

夢逐風帆並海行海山何處最關情江都此去無多

路水部從來太瘦生白日漁磯披短褐青燈書屋對  
長檠相思欲和陽春曲愧殺驚人語不成

江亭夜飲至曉醉贈席上諸君子

畫閣清風五月寒淺斟高詠一宵懽冰分玉井侵盃  
冷雪壓銀鱗落紙乾並海商帆雲際識隔林漁火雨  
中看揮鞭且莫衝泥去秉燭惟須待夜闌

次成石田輅韻

寂寥空谷斷人蹤入夜欣聞石路筇花剪小缸輕粟  
絢筆抽枯硯暗塵封林疎不碍當樓月簾薄偏烘隔  
水峯聞道浣溪新卜地一尊他日更相從

贈岑師

師在三  
角山

山暎樓前日欲低昔年曾過武陵溪  
名留石榻苔應合夢入仙區路不迷  
古寺殘花佳節度晚窓深樹亂鶯啼  
逢僧更結尋真約賦得新詩醉懶題

別公洪崔都事

振雲

綠水紅蓮佐幕行白雲黃鶴擅詩名  
危樓百尺清風峽故國千年半月城  
不淺元規登眺興更堪王粲別離情  
尊前日暮仙驂遠江樹秋生旅鴈聲

送全羅趙都事

邦直

綠苔門巷候虫秋青眼相逢又別愁  
失路誰知天下

士臨危還把幕中籌周南版籍三千里  
馬首蕭笳六十州幾處新詩高紙價一  
聲長笛廣寒樓

自數日受寒伏枕今晚始起籬底小  
叢菊猶未吐藥感而有作

獨登江上最高樓醉破人間不盡愁  
病為佳辰無五日花經今夕負三秋  
床頭秃筆抽塵甲袖裏雄刀動蒯緱  
看取歲華消歇處鴈拖殘照過簾鉤

挽李礪山

奉

遷葬

力盡金城馬不班氣衝銅柱隘南關  
沉沙斷戟行軍壘宿草寒雲望子山  
丁鶴有時華表返溫生無夢洛

陽還他年點檢看青史名在忠臣烈士間

次東嶽韻別李士致行遠

看劍中宵雪鏹明寸心千載詠荆卿朋知落落燈前  
會賢達寥寥死後名萬國窮途無避地四郊多壘恥  
談兵最憐王粲登樓日清渭終南不盡情

次士致留別韻

貂裘夜典酒人家烈士雄心醉後加古匣銀星衝劍  
氣暗窓金粟落燈花三霜楚戶魚書斷九月衡南鴈  
陣斜最羨明朝浮海客少風波處閱年華

奉呈北渚案下

深宵渴夢劇吞江欲毀新茶凍玉缸趣撥寒灰煬宿  
火輕挑微焰對殘缸鐘聲暗帶風傳枕簾影偏隨月  
入窓醉語醒來渾不記但將佳句寸心降

次東嶽韻

山下孤村早掩扉隔簾疎月倚城移金爐水咽傳觴  
促銀箭風微報漏稀秉燭須拚長夜會飛砂欲駐少  
年姿湖潭他日誰爲伴浦鴈沙鷗亦可依  
前林日脚下荆扉復照西窓影漸移甲第笙歌當路  
發孤村烟火近城稀文從弱歲唯神造病入窮途却  
老姿賴是黃庭經在手靜中心事得歸依

次士致寄示韻

洛陽諸子不如君妙歲聲華獨出羣鸞鳴聳飛東觀  
筆珠璣錯落北山文三更夢斷吳洲月千里書回洛  
水雲媿殺江郎才已退欲將詞賦試風斤

記夢

夢岳君與竹陰陪歡北堂持國後至先賦

嬌歌緩舞雜繁絃朱李青瓜泛玉泉西海放臣同席  
上南關遷子亦尊前梁園待客相如後驪穴探珠禹  
錫先最是北堂佳氣象椿陰滿地日如年

次持國寄示韻

天不容吾二三子東西契濶病纏身十年風雨燈前

面兩地參商夢裏人早以文章干氣象仍將藥餌養  
精神從君欲借還丹訣此去仙山隔幾塵

次汾西韻示滄浪

滄浪今改遲川

自倚江湖舊習豪平生不解拜蕭曹章臺走馬春相  
過廣澤呼鷹日以遨彩筆新誇詩脫稿青旗頻報酒  
登槽猶堪睥睨風塵裏晚向吳門滅迹逃

附原韻

鼎坐談鋒各自豪秦城誰料復吾曹唯憐依舊山  
無恙更許從今老共遨點檢囊中詩幾首思量身  
外酒盈槽王孫纔得除門籍頑信吾歸不是逃



汾西

次子謙持國韻

子謙崔公吉字

支離一病又經旬  
玄晏平生是後身  
白日閉門惟我輩  
青春得意竟何人  
瓢壺貯水調松葉  
石鼎敲冰煮茯苓  
自笑少年豪氣盡  
任他懸壁劍栖塵

城南閉戶自前旬  
潦倒生涯任病身  
鑪下對燈燒藥婢  
竹邊催杵碾茶人  
元知嗜酒仍傷肺  
更覺吟詩亦損神  
獨倚書床成少睡  
夢尋蘭室挹清塵

附原韻

去時風雪來時雨  
客裏酸辛病裏身  
世故不曾饒

老子天公似欲困  
騷人百年行役偏  
凋鬢千首文章謾  
有神從此田居牢  
閉戶不堪知己間  
音塵

持國

一病涔涔又一旬  
偏知造物惱吾身  
還聞紫禁頒新曆  
叵耐青山隔故人  
藥餌豈能留齒髮  
文章只得弄精神  
知君自有龍韜策  
談笑從容靜塞塵

子謙

復用前韻示子謙持國

思君不見今幾旬  
我欲奮飛病在身  
既使吾儕並一世  
何時爾汝成三人  
尊羹鱸膾與無際  
黃鶴白雲詩

有神自笑匡山讀書客  
歲名酒肆老風塵  
潦倒無堪醉十句文章  
從古不謀身  
燈前荆楚歲時  
記病裏東西南北人  
老竹寒聲風動葉  
短梅疎影月  
傳神仍思去歲今宵  
會競逐香車夾路塵

立春日書懷

曾賦迎祥春帖詩  
去年今日杜門時  
名逋白簡非初  
願息與彤弓  
豈素期  
水岸秋風移晚棹  
山齋夜雨落  
寒碁銀幡彩勝  
無消息  
故里歌鐘有所思

別李景三

午夜微雲月露痕  
九街人靜漏籌繁  
青春意氣懸燈

話白雪文章對榻論  
王粲在門曾倒屣  
陶潛閉戶獨  
開樽南隣咫尺  
猶回首更向明朝  
何處村

次子容韻

少年多病壯心頽  
榮落人間付倘來  
並隊枯魚惟有  
沫同鳴雙鳥  
本無猜  
秋深江漢常懸榻  
歲晏鄉山獨  
把盃大雅遺音  
重見否  
喜君高卧富詩材  
詩壇昔日共聯翩  
淪落他鄉爾可憐  
驪穴探龍誰閣  
筆兔園司馬未登筵  
秦中舊識青雲斷  
郢下新名白  
雪傳滿地  
江湖魚鴈少  
一樽風雨夢相牽  
看得夔州以後詩  
方知萬類為君疲  
相如合受尚書

筆韓信須持上將旗楚壁隋珠同皎潔商彝周鼎兩  
瓌奇扁舟老去終何補千載空教志士悲

挽白進士

振南

南極文星動海門玉峯詞翰萬人喧驂騶墮地能千  
里鸞鶴昂霄已九原寶版金書懸日月落花飛雪滿  
乾坤休誇羲獻傳神妙爭似君家祖子孫

又代作

早年文墨繼家風碧樹珊瑚映海東久識才難關世  
道須將物化問天公黃庭字誤清都遠白玉樓成翰  
苑空何處青山埋好手橘林秋雨阻詩筒

次汾西韻贈鄭僉使

忠信

北塞孤魂歸未歸東山赤鳥已苔衣淒涼夜雨海邊  
路寂寞春風柳下磯後事空餘雙壁在遺篇欲買萬  
金微人間不盡羊曇恨同向青山泣暮暉

鄭亦白沙門下人故

仲春望擬與朴就之

遷訪持國因過趙大亨

昌

遠屬有雨徵詩以遣興時國在青楓亭在丫  
流云

月固宜人雨莫愁雨中簑笠月中裘從君直向丫流  
洞乘輿因過太古樓笑接將來奉常飲還招原任翰

林遊歸途定是晨鐘後不怕金吾夜禁稠就之例遷太常持國

次東嶽韻却寄

銀臺清夜閉金扉水咽銅壺漏箭移蠟燭影斜書字  
大獸爐香盡佩聲稀芭蕉捲葉抽心啓松栢昂霄出  
壑姿一卧滄江春寂寂九重如海夢依依曾在直廬見燈下記

草故篇中及之

山村夜雨濕荆扉籬外青橙手自移滿目芳菲佳節  
過隔江雲樹素書稀題詩擬和陽春曲對酒長懷玉  
雪姿他日萍蹤倘飄泊荊州應許仲宣依

青春紫氣海雲明百里雄城借貳卿當代子雲能識  
字近時孫楚更知名臨江節士空鳴劔破虜將軍已  
進兵聞道晉陽勤保障任賢今日見宸情

次東嶽韻

日暖江橋花近樓滿城春色醉遨頭循良漢吏二千  
石節鎮王畿三十州海內文章元事業樽前意氣足  
風流孤舟明月欲乘興路過山陽無限愁石洲舊廬在江都故

樂全酒席次李士以行健韻贈行士以將向湖

南再娶云醉甚倩李德輿碩基書

我曹今日尚秦城青眼相逢即舊情  
花滿故山鄉思亂酒醒孤館旅魂驚  
東床夜月乘鸞去南國春風信馬行  
紙價衡陽高幾許喜君詞賦有新聲

挽呂僉知順元

久識純陽地上仙恭聞申國盛名傳  
贈之一品自三品加以十年幾百年  
卿月將星睽膝下玉符金帶堆  
牀前哀榮於世更無憾好向青山何處邊

晉安第煮艾會次汾西韻

採得商坡雪裏春煮來風味勝吳尊  
仍炊菰飯香流匕更薦松醪煖入唇  
韋曲何須臨澗壑秦樓亦自出

風塵華茵醉倒君休笑分付傷人整角巾

送人朝京

生憎鴨綠限遼陽約束男兒老一方  
萬里堯封新鼓角百年箕壤舊冠裳  
蒼茫落日秦城遠蕭瑟寒風易水長  
安得共君朝北斗五雲多處近清光

送春日還自箭郊醉起口號

雲暗風淒欲雨時野橋歸興滿  
簑衣巖邊酒煖枯松子溪上魚穿弱柳枝  
禮法豈因吾輩設江山應與俗人違  
醒來已報春將盡起向花前更一危

次岳君韻

時有深後

始稱元帥董天師終作降俘拜月支俯仰乾坤何面  
目指揮君父敢言辭休論家世羞千古爭道恩光冠  
一時看取廟堂吁咈處建州書襍鎮江咨

答士敬

秦樓日暮散霜蹄門外垂楊裊裊低別語醒來都不  
記新詩詠罷為誰題才名已返江郎錦交義猶存范  
叔綈一紙書回驚午睡隔林疎雨暗淒淒

次辟上韻題朴卓爾

弘中溪堂

同社秋山一壑中百年身世灌園翁花前對酒霑衣  
露墻角吟詩滿袖風雨洗魚梁春草綠月沉碁戶夜

燈紅林泉剩得優遊樂謾說人間此路窮

聞子謙仲淵訪張正國

綸及持國於茂城第甚

盛會也病蟄獨未赴謾書一律

仲淵錦陽都尉字

嬌歌急管咽斜暉萱草榴花映舞衣兄弟交游皆挺  
拔公侯樓閣復光輝騎曹載酒聯翩去都尉鳴鞭意  
氣歸獨有馬卿長卧病柳橋南畔掩荆扉

附和

周南留滯已三年一入長安即勝緣細聽佳人彈  
錦瑟共携良友醉華筵欣逢逐客真亭伯不見矚  
儒是列仙今日得君詩寄到舊遊回首意茫然

聞子謙蒙赦

銜書丹鳳出金扉  
雷雨春來蟄羽飛  
羈陛尚憐離綵  
伏鯉庭剛喜舞斑衣  
何須便面章臺過  
直擬隨肩夾路歸  
今夜石榴花下月  
故人扶病莫相違

和子謙蒙赦後寄示

漢庭賓客集如雲  
草奏何人奉聖君  
方朔談諧曾待詔  
馬卿消渴獨離羣  
清朝雨露恢殷網  
紫塞風沙暗楚氛  
君到鳳城應有感  
十年長樂舊鐘聞

和持國

持國

秉筆曾為玉帝臣  
紫清宮禁掌絲綸  
人間謫下黃庭誤  
海上移居白屋貧  
宣室他年應雨露  
騷壇此日復陽春  
誰教我輩風塵裏  
共把虛名患有身  
懶性元來任靜便  
窮途猶不受人憐  
昇沉儘我形骸外  
許與唯君意氣邊  
遇酒難禁開口笑  
披書仍作曲肱眠  
須將藥物供遲暮  
同向滄洲理釣船

苦熱

火輪當午熱雲升  
旱焰燒空氣勢增  
無路臨淵投赤貉  
有時提劍怒蒼蠅  
涼思漢殿金莖露  
爽憶唐家玉井冰  
聞說談河能止渴  
舊銜猶喜水曹稱

病中書懷贈任子靜統

漏雲微月下西樓散步閑階一散愁雪路細鳴桃竹  
 杖露華輕濕木綿裘團圓此日俱青眼離別他年欲  
 白頭最是江山搖落後淺斟低唱亦風流  
 中夜悲歌獨倚樓短檠殘燭暗生愁風雲未化雷公  
 劍歲月頻驚季子裘末路行裝難着足暮年離別幾  
 回頭何時就得分山計同向滄洲釣碧流  
 每憐王粲倦登樓客裏風光揔是愁醉後何嫌鸚鵡  
 舞醒來復典鸚鵡裘詩傳白雪方開眼語到青雲欲  
 掉頭休道世間知己少卷中揚馬即同流

寄鄭僉使忠信

橋頭楊柳綠烟絲記得西郊並馬時別後夢魂都不  
 隔病餘顏面兩相疑紅蓮幕裏陳琳檄青草湖邊鄭  
 谷詩聽說元戎新謝事妙香山色滿旌旗

禁直

三殿鳴珂拜夕郎九門收鑰履聲忙朱衣引路天階  
 下絳燭分光御座傍金井水寒初啜茗玉爐烟盡  
 更燒香時清敢擬投封事且共仙曹醉一場

守申日在衿陽客館懷子容持國無示舍弟

寂寥空館夜如年坐數寒更耿不眠上訴三虫傳故



事同鳴雙鳥富新篇山風吹面酒初醒曙色入窓燈  
自懸最憶杜陵諸弟會恨無飛翼墮樽前

夜飲高秘書家受寒伏枕鄰友輩以余將有龍  
灣之役置酒爲驩余既病不能任酒三盃即  
泥醉不復知有所酬唱也醒來舍季示余以  
步余韻詩遂因此記之果於醉裏有漫興一  
律想醉筆胡襍敢易紙書留別席上諸君子  
南村細酌戴星還風露淒淒鶴警寒扶杖只緣行藥  
苦閉門非爲著書閑黃河白首忘年契斗酒高歌盡  
日歡焉得攜如謝朓手雪中同卧妙香山

送子容南還無示持國

離懷悄悄動悲歌郭外寒雲晚更多秦地立春傳細  
菜楚天踈雨濕輕蓑樽前把劍心猶壯帷下含毫髻  
欲皤莫說文園終寂寞大名千古有江河

荷冠酒席復用前韻別子容

休唱陽春白雪歌由來此曲和無多殘燈旅館彈長  
缺細雨烟波憶短蓑歸夢不知鄉路遠羈愁偏覺髻  
毛皤應將物色供詩料臘後層冰正塞河

松都

五年三渡橐駝橋故國繁華轉寂寥夾路垂楊晴裊



發黃菊初殘竹葉疎煮菜燻魚村社靜數帆觀月夜  
窓虛仙經讀罷無餘事時有茅山道士書

雨中過白沙先生故宅

城南故宅掩荆扉村巷寥寥燕子飛芳草池塘烟漠  
漠落花時節雨霏霏英雄已矣青山在鐘鼎依然赤  
烏非未必羊曇偏有感路人猶自涕沾衣

送千秋使金侍郎

大德

纔見吳人戴素柰復聞虞帝狩蒼梧攀髯已後千官  
列執正仍隨萬國趨爲赴青宮回慶節還瞻白日繼  
高衢烏蠻自此寬愁寂故里衣冠對董狐

星盖翩翩萬國來少陽佳節屬秋灰天寒八月盧龍  
塞路盡千年駿馬臺班近金莖衣有露駕回黃道伏  
成雷同時且隔尚書筆謾擬相如作賦才

送聖節使九畹李祭判

春元

午門殘漏滿靴霜躡得仙班拜紫皇露下金盤涵月  
彩風搖銀燭絢星芒宮醪欲瀉杯先重內帛將擎橐  
已香從此帝城增紙價使華爭道繡爲腸

送人朝京

星輶計日度遼陽節近長春萬國忙澗步青雲看氣  
象高吟白雪見文章天臨寶座星辰爛花覆仙班劍

白洲集卷之七  
十六  
履香朝罷更添光祿酒珮聲遙下紫宸傍  
春盡金臺驛使遲白雲西望淚雙垂頻年此別三千  
里一日相思十二時魚亂未堪傳遠信鴈過無處問  
回期煩君領我深情去報道書中不盡辭

牙山白石津舟上口誦

綠陰遍地日如年白石里前江可憐迎神擊鑼此郡  
俗舉網得雋誰家舫村鳥亂浴水平岸海燕高飛風  
滿天樓頭遷客鬢成雪極目秦京阿那邊

次岳君韻

幕岸驚濤打釣舫渚禽飛盡樹含烟潛夫著論江湖

遠屈子離騷日月懸病裏經春常閉戶興來攜酒獨  
憑舷明朝匹馬沙橋路回首新山更可憐

次岳君韻送鄭僉使忠信

相門賓客散如烟澤畔相逢亦偶然天意不曾遺一  
老世間無復見真仙侯芭負土青山日王祭從軍紫  
塞年去住即今俱是客晚風和淚洒江天

次岳君端午寄示韻

海畔羣山點點青逐臣何處望天旣經春活計貧原  
憲避地羈愁老管寧花塢細烟移藥鼎竹窓微雨檢  
茶經相逢爛飲菖蒲酒醉睡桐陰綠滿庭

白洲集卷之七  
十九  
一從王事客西京春盡歸來鬢欲明  
萬里江湖仍浪跡半生文墨竊虛聲  
將身已付無何有嗜酒其如太瘦生  
勾漏鍊丹遺宿債肯教仙令獨留名

次摩詰

少年裘馬洛陽城酒後清狂四座驚  
阮籍窮途猶意氣茂陵多病亦風情  
從知許與違時論肯使聲名付月評  
踈懶即今才已退郢中高唱任君成

附原韻

百里雲山隔鳳城故人書到使人驚  
羈蹤蓬落元無定煦沫慙慙謾有情  
我比敬通差自適君如武

子不容評詞場鞞勒今真厭準擬唯聲一請成

摩詰

和寄高善行用厚

馬卿詞賦氣凌雲不待吹噓感  
至尊爭覩鳳毛翔日下更傳鵬翮碍  
天門桐州歲月凋雙鬢錦里烟花  
卧一村應有寸心懸北闕曉班仙珮  
夢中喧

挽宋同知

英考

即似離塵絕世者忽如枯木死灰然  
適當事有難言日自信誠無未格天  
直氣肯隨凶歲餒剛腸不受俗人憐  
君恩尚借城東地免使招魂瘴海邊

次崔大容韻

向來漂泊苦西東昨日清遊恨不同  
 萬里江湖猶我病百年天地為誰雄  
 樽開滿座春風裏筆落遙山夕照中  
 更待高樓人散後快看新月轉晴空  
 露洗星河月欲流水風涼透木綿裘  
 平林細火分漁店暗浦輕檣識釣舟  
 我輩相逢仍勝地世間何處更高樓  
 江山萬里堪乘興無奈浮生別有愁

代王淪送李白月課

桃花水暖柳橋平二月村鳩相喚鳴  
 出屋青旗初引路入門烏帽舊知名  
 扁舟夜雨樽無恙落筆江山畫

有聲惆悵明朝分手後  
 楚雲秦樹共含情

承試官碑 召闕下偶吟

左掖傳呼午鼓鳴  
 趨班仙珮響三清  
 鸞書寂寂門先閉  
 鳳閣沉沉燭屢更  
 露綴崇桃微滴瀝  
 星臨紫籞迥分明  
 宮壺爛用銀泉水  
 添得詞臣病渴名

送冬至使崔僉知

真遊不返白雲鄉  
 五十年光夢裏忙  
 已近青臺頒鳳曆  
 忍瞻丹袞換龍章  
 即今萬國傷心地  
 依舊千官滿眼香  
 此去靈車攀得否  
 小臣西望但沾裳

送書狀高君涉

三洲集卷之七  
二十一  
騎省郎官能記馬行臺 御史還乘駃文章自許我  
輦事節義肯虧君家風黃塵此時暗紫塞白露昨夜  
凋青楓哀鴻去去欲何向雲盡湘山初日紅

灣上口號

鴨江西畔鎮江城萬里風烟接帝京關吏已驚頻往  
返使君端合倦將迎誰家少婦吹蘆管何處殘兵卧  
柳營風物有餘邊思苦獨登危閣引深觥

直廬夜占寄持國

雲閣深深夜未央短簾疎月隔清霜虬傳促漏頻來  
枕鼠啮殘燈暗度床屈指半年長作客強顏今日又

潜郎憐君更抱文園病生死同尋肘後方

寄朴兄

大健

江陵集慶齋閣

大海漫空嶺路賒此行非爲鍊丹砂雄心歲暮頻看  
劍薄宦天涯政憶家脚底羣山浮翠黛枕邊初日漲  
紅霞名區濟勝渾閑事何處思歸咏白華

次玉堂趙學士韻

宮醪凸勺醉爭傳並着華堂繡被眠暮歲行裝看一  
劍故山栖息憶三椽花磚曙月微吟裏蓬島烟霞緩  
步邊共道文星輝玉署倚樓才格謫仙篇  
長笛殘星和更稀渭南才調冠當時詞頭夜下呼銀

白洲集卷之七  
二十二  
燭講舌初乾奉玉危漏靜鑿臺閑似定珮聞磚路會  
如期兵郎事業惟弓劍謾向仙曹學賦詩

春帖

衆象白涵一氣真太平文物萬方新和風已占豐登  
瑞暖律仍催發育仁爆竹前宵傳楚俗屠蘇此日賜  
宮臣丹青別有難工處無限繁華滿眼春

三太醫持酒夜訪醉席口號

入直騎省時

直廬風雪夜將闌青眼逢君盡意歡國手應存醫國  
術書生唯問讀書丸燈前把筆猶含凍帳裏開樽不  
受寒多病故人來往少百年高義此中看

詩情不逐宦情闌到處開樽輒盡歡但使風雲輸彩  
筆休論日月劇跳丸宮梅細浥春烟重御柳猶含臘  
雪寒此會百年知不易畫圖留作後時看

翌朝又寄

醉欲醒時睡亦闌病夫前夜爲君歡飛騰意氣雲千  
里局束男兒土一丸官序何嫌潘岳拙詩才不數孟  
郊寒朝來試問春消息窗外梅花帶雪看

夜會玉堂金太醫寄詩走次贈之

庭畔梅花早得春入簾踈影巧相親風搖蠟燭星芒  
絢月昃銅盤露氣新此會可能無一醉我曹相對即



三人仍聞禁裏玉弘在虛擁寒爐坐到晨  
蓬島烟霞脚底春侍臣環珮望中親丹爐照室綾衾  
暖素月當窓練帶新內閣封章多暇日滿城歌吹幾  
閑人龍鍾抱病仍無寐手閱殘編每及晨

大殿春帖

居首賜弓

青臺新律逼青陽雪裏梅花暗吐香秦地立春生菜  
細漢宮傳燭暮烟長班隨寶仗登仙陛恩與銀幡出  
尚方應有子雲文似者欲將詞賦獻明光

送定平防禦使

自天題處印紅泥御札親擎紫殿西舊任循良都

護重新兼防禦揔戎齊應教百里喧歌頌可但三邊  
息鼓輦堪笑腐儒何事業直廬燃燭到晨鷄

次李侍郎

春元韻入直騎省時

宿雲平覆掖垣長漏日微烘榜額黃御柳壓簷簾濕  
露宮梅墜硯筆含香人間酒暖皆春色禁裏官閑最  
寵光滿眼芳華如可掬倩公輸向顧長康

復次李侍郎韻

瑣窓岑寂省庭寬釀雪春陰作夜寒風送漏聲敲枕  
聽月移梅影隔簾看病來吳漢杯心淺夢罷江郎筆  
力殘多荷老師容後輩好將談屑破愁端

兵厨休說酒杯寬  
踈筆綾衾夜直寒  
暖帳誰家金縷唱  
綺筵何處玉燈看  
偏憐沈約腰圍減  
早覺潘生鬢髮殘  
無物可堪供嘯傲  
強驅春色入毫端  
詩腸較似酒腸寬  
世味都無病味寒  
簪紱累人違宿計  
芳菲隨節稱幽看  
黃浮柳眼和烟膩  
青逗松顛帶雪殘  
清夜向闌宮漏細  
下簾聲在彩雲端

送謝恩使

恩承 聖祖謝神孫  
此去何日拜寢園  
會使羣臣重拭淚  
益憐東土舊含冤  
行穿鼓角連青海  
歸趁烟花繞紫垣  
合有神明扶宿德  
不煩申祝送征軒

別問禮官

馬前高蓋若流星  
玉署仙郎問禮行  
野店山橋爭入眼  
驛梅官柳幾關情  
趨庭未覺他鄉遠  
返節懸知不日迎  
尚有臨歧兒女恨  
敢言浮世別離輕

次劉天使漢江韻

蘸江紅日絢明沙  
山店漁家辨兩涯  
繡幕翳雲蘋浦暗  
牙旗拂岸柳絲斜  
休將蓮燭催星駕  
且住蘭橈待月華  
得御龍門真不分  
更從深酌醉瓊霞

端午帖居首

瑞日初昇法殿東  
切雲金榜麗晴空  
人間酒暖香蒲

葉天衣輕細葛風此日爭持長命縷萬年恭祝大  
明宮千官賀罷瑤池下正是南薰曲未終

在騎省直廬寄銀溪楊督郵萬古

方信君家道氣濃謫官猶對萬千峯危橋架壑通雲  
棧小店臨溪響水卷垂柳陰中調櫪馬亂花香裡課  
衙蜂仙山此去無多路夢罷街樓五夜鐘

送咸鏡李按使弘淸

秋日褰帷大漠遙塞天笳鼓引星輶經綸玉壘三千  
里方略金城十二條雲際孤烽來遠戍月邊哀柝警  
寒宵蠻江萬折終何向聞道西藩且壓遼

怒髮衝冠劍躍鞘一隅殘孽恣咆哮徑趨遼塞應摧  
壘直搗陰山可覆巢今日朝廷須此老百年疆域忍  
全拋高牙大纛青門路已報妖塵淨四郊

贈持國

寄語安山舊翰林別時多事未重尋題詩我必懷同  
調對酒君應歎獨斟近樹寒蟬催暝色隔簾疎雨動  
秋陰扁舟明日金陵路安得相邀到海潯

附次韻

多病誰憐舊翰林向來歡會杳難尋茶湯每遣山  
妻煮麥酒時同野老斟聞說扁舟遊海浦可無高

興訪山陰遙知待我詩成處紫綺烏紗映碧潯

摩詰

七夕

金井梧桐一葉飄二星佳會杳雲霄他時定欲趨牛  
渚明日誰教毀鵲橋青女生涯秋脉脉素娥棲息月  
寥寥長天碧海無終極不及年年有一宵

喬桐客館次趙府院君浚韻

數點殘星一鴈飛渭南佳句倚樓時風光滿日渾依  
舊城郭傷心半已非燭下深杯濃琥珀月邊遙海澄  
瑠璃良宵剩有胡床興不覺秋天露濕衣

別海西趙都事

青衫幕府馬如龍海上風烟接甸封國值艱虞須鞅  
掌政無濡滯即雍容詩成孤竹城頭月夢罷金沙寺  
裏鐘同舍故人今孰繫倩君重攬舊遊蹤

次鄰丈韻

至後初陽幾線長撲簾飛雪攪詩腸元知瑣力洪鐘  
噎誰擬狂瀾隻手防任重何容歸綠野丐閑非爲厭  
黃堂君看昨夜青臺奏儘道年來變是常

清夜沉沉刻漏長凸甌村釀緩枯腸新開詩壘堅難  
破舊壓愁兵弱未防奇禍已驚嬰落弩戒心無賴慎

白洲集卷之七  
二十七  
垂堂從今點檢雞豚社咬得寒癸即士常

水鍾寺

暮倚高樓第一層石壇秋葉露華凝羣山衮衮蟠三  
縣大水滴溜謁二陵烟際喚船沽酒客月邊飛錫渡  
江僧酣來暫借蒲團睡古壁蓮花照佛燈

文殊寺次東岳韻

吹徹江城笛裏梅夜深徙倚寺前槐僧從絕壑層雲  
下客與前峯霽月來殘磬依稀兼遠籟花龕剝落半  
青苔書生鞍馬還堪笑喫盡人間幾斗埃

拱北樓次九畹李巡察韻

粉堞逶迤浸水明北樓秋思晚淒清千年割據三韓  
界百里丘墟半月城暇日開襟王粲淚曉星聞笛渭  
南情茲行不覺郵程遠無限青山馬首生

快心亭次石樓韻

醉睡官齋不掩扉竹簾踈影已斜暉身如旅鴈隨陽  
去心似浮雲盡日歸映燭誰家挑錦字亂砧何處搗  
寒衣遙知洛水橋邊路一樹新梅待臘肥  
微霰淒淒壓路塵九街鍾動閉城闌共驚湖海投身  
遠不厭杯觴到手頻家信只憑南去鴈鄉音未慣北  
來人孤眠永夜寒無夢隔幔踈燈影獨親

南溪形勝畫圖如故國樓臺落照餘市散官橋村路  
暝獵回山店洞門虛孤吟旅館懸燈後清興胡床倚  
劍初珍重主人能醉客幾回臨去幾躊躇  
群山隱約翠屏舒城郭周遭十里餘傑構何年留勝  
跡舊聞今日未全虛秋林正對霜酣後水檻偏宜月  
上初清賞未闌歸意促不堪臨別更躊躇  
白雲紅樹萬重山小傘輕輿岸幘還天際獨存遺世  
想公餘時有檢書閑諸曹席末霑醺渥衆象毫端破  
秘慳千里躡塵催告別寸心歸趁舞衣斑

耐原韻

羈懷悄悄掩重扉野色荒荒隱夕暉新月漸從峯  
頂上暮禽多向竹林歸三聲斷角聊憑檻一陣淒  
風未授衣遙憶故園無限好火枝張傘紫臍肥  
華館深深不起塵女墻如畫繞城闌戟門風約懸  
旗掣官樹霜清落葉頻送老自然仍抱病逢春長  
作未歸人相傾賴有同遊伴白髮樽前意更親

石樓

李奉事道吉家酒席次壁上韻

一頂烏紗岸夕涼竹輿來往水雲鄉厭看官饌豐排  
案笑把村醪釀凸觴花塢尚留殘菊艷菜園新摘晚

白州集卷之七  
二十九  
惹香東鄰擊鼓西鄰舞不必繁華減洛陽

洪宣諭千環自完山將向羅州臨發寄詩曰吾

已上馬矣子能嗣音乎免曳白為幸詩工拙

不論也走次其韻而寄之

載筆轅門歲易道盍簪湖海值清秋休言世路經千  
變共許詩壇第一流錦里衣冠多舊識江南烟月阻  
同遊公歸若問吾消息為報羈棲暮翮投

永保亭夜坐

夜深寒氣襲貂裘波撼孤城百尺樓風外鴈聲來遠  
浦月明人語在孤舟千盤鳥道通三島萬點鰲山近

十洲自笑吾生真夢幻乾坤於水亦萍浮

挽友生慈堂

先朝耆舊典刑尊媿德元稱積慶門幾處魚軒專厚  
養重封花誥煥新恩八旬康健怡愉樂七十曾玄內  
外孫蓮幕下僚今白髮不堪沾灑望秋原

次汾西韻兼示西華

西華李公  
行遠號

抱病深居遣日難獨繙殘簡為研丹闌如老宿初修  
戒惱似慙娘久別歡幾處嬌歌金帳暖自憐孤詠雪  
窓寒斑駘赭白前宵會偶被都人夾路看

慣聞行散取功難謾說仙家九轉丹假使烟筒為聖

藥豈於春酌混清歡茶稱石臼千敲細水號曹溪一  
滴寒誰會此方蘇肺氣可憐陶穀已先看記酒席問答  
詩思春來上瀨難彩牋千疊東霞丹東陽抱病仍添  
瘦老杜逢場却盡歡燈市繁華佳節近本花消息夜  
霜寒分明十二橋頭月乘興還須並馬看  
千曲羊腸取路難任它門外轂朱丹功名已付兒曹  
立詩酒真供我輩歡剡曲秋藤吹管滑灞陵春釀澈  
甌寒明朝便面章臺路共向秦樓意氣看

復用前韻示西華與汾西和之

咄咄銅壺住景難上清桃萼幾回丹休誇美玉山頭

會且盡銷金帳裏歡題罷越裙香霧濕戰回吳局曉  
星寒春來行樂須聞健久任街兒拍手看

自視鮎魚上竹難冷灰無復再燒丹詩壇約束聞新  
令酒戶勾牽減舊歡春事不妨前夜雨花心初放早  
梅寒它時與馬成三去更有何人白眼看

千尺竿頭步步難寸心無處可披丹陽和未散窮途  
恨霈雨從添酒轍歡家在西湖春水濶夢懸長樂曉  
鐘寒涼州已作人間曲不恨當時下里看

癡漢方知戒酒難醉顏非爲借仙丹林泉入夢吾當  
返猿鶴無猜爾可歡沙塢種花須就暖石床燒葉不



教寒青鞋布襪都無恙滿眼江山盡意看

挽閔同知昌胤

記着門前把下時勸君加飮問君歸村花欲吐還如  
約社酒初香更待誰茅舍斷魂惟月色草心無語奈  
春暉千年不盡冤禽恨未必人間死別悲

挽清風君金公權

酒盡河橋上馬時一言長訣淚雙垂桑榆晚景元無  
幾嶺海生還更有誰浮世不關論議定寸心猶恃  
聖明知丹旌獨與陽和返驛路開花滿故枝

次題白雲亭

青門瓜地接東時天闌華陽洞府寬心與世違全素  
履境因人勝改前看尋春野老吟詩過帶月村童得  
酒還聞說九重虛夜席肯教泉石占長閑

挽南進士銑小室

上舍才高尚布衣十年憔悴壯心違誰知夜月乘鸞  
去不待春風疾馬歸應有夢來惟枕在更無人見只  
簾垂諸孩滿眼終何恃淚盡窓間舊錦機

挽金正字德承內

謝家蘭玉遍庭階內學尤稱道韞佳契濶詎堪勞遠  
夢出還猶及見殘骸非唯相府方移病可忍孩兒遽

免懷最是伯鸞存舊約幾回中夜泣荆釵

別李叅判朝京

絳節隨雲拜玉皇岱宗秋色海茫茫長風破浪帆無恙  
片月懸空劔動銍一語恩褒何見晚百年侯度此行  
忙神明有護須公等聽說延陵已帝鄉

次題趙學士萬卷堂

清絕南溪學士居比來詩興問何如殘紅戀樹花香  
細軟綠粧林竹影疎乞句僧敲門掩後載醪人過月  
生初煩君萬卷牙籤裡倘有平生未見書

挽黃僉知汝一

天假詩翁晚節閑筆頭輸盡舊江山錄成銀漢乘槎  
去賦就銅標解印還身向糟丘存活計兒從粉署輟  
清班齟年侍酒渾如夢一紙緘辭滿袖潛

次大容韻

遠遊何處憶秦中一別無端歲已窮跋涉只因王事  
急襟期元擺俗緣空三行紅粉分司筆一路澄清  
御史風自笑防身霜刃在病來無夢到崆峒

次贈日禪上人

負笈禪房憶舊蹤閉門京口愧塵容流光冉冉題名  
卷孤夢依依罷梵鐘抱病經秋無客到對僧今日染

白洲集卷之七  
三十三  
歲慵何由共踏鳴沙路看盡東南海上峯

挽申兵使

山西豪氣恥爲儒投筆登壇是壯夫  
萬里胡沙曾伏軾十年邊閫幾分符  
臨危擬獻金城略遣興時揮墨竹  
圖門黨祇今零落盡可堪垂淚對雙珠

送長淵鄭使君

世美

有時清夢到金沙仙賞分明覺後誇  
江月細搖漁市笛海風時送漢臣槎  
官陞都護因人重薦出巖廊屬望  
加深巷見臨慙授簡退才無復筆生花

送宣川權使君

帖

幾年衝斗秘神鋒晚試華陰亦繫逢  
海日騰輝呈遠舶塞星搖彩絢孤烽  
臨危可但羈縻計修擯非惟進退容  
一片青山依舊色謝公詩興較誰濃

送江原都事李汝思

景憲

觀風多事飲冰忙飛鳥難便理屐妨  
暇日窮歡惟幕府鎮時延賞即仙鄉  
鳴沙細雨棠花落古寺清霜桂子香  
想到瓜期應有貨萬千峯色一奚囊

送許

御史犒軍關西

塞門春色覺先迴饗士息書雪裡開  
喜氣漫空噓暖霧歡聲挾路殷晴雷  
平沙列竈千夫膳落日鳴鏡上

將臺北望深河應有賦繡衣無謝李華才

燈下口占別姜公獻瑜

露如微雨壓輕塵簾外餘寒閣早春歡趣恐教兒輩  
覺交情惟許故人親三年峽裏傳書遠半夜樽前跋  
燭頻浮世可禁催白髮一番離合一傷神

東郊觀打圍

薄雲微雪掩朝暉並馬春城看打圍列隊傳呼爭趁  
角上壇中令改懸旂平蕪洒血胡鷹厲利鏑吹毛野  
兔肥自是吳兒忘死樂肯教人羨尾爲衣是日有小  
雪故落句

翌朝復次前韻寄金東村著國

簇天兵氣壓春暉百隊駉兒十里圍山逕乍迴風斷  
角野壇新闢雪翻旂行觴列幕春添暖洗鏃前溪水  
減肥不怕田間逢醉尉且從墟下典朝衣

挽尹佐郎內

籍甚先朝太史黃代言家世擅文章當時擇婿須丹  
尹少日知名是省郎共恨仙桃遲結子誰言寶婺遽  
沉光驚心十載風霜後不但人間死別傷

迎祥居首

雲物淒迷欲曙時曷爐流月報更遲香烟乍起仙班

定思綉纒宣內閣知御柳將舒春已動宮梅初放雪  
相宜詞臣幸有揄揚筆擬續元和聖德詩

春帖

朱衣儼鼓餞殘年紫殿祥符揭半天春菜細挑秦地  
雪臘梅輕濕漢宮烟紅雲正覆金爐側瑞日初升玉  
座邊飲罷衢樽仍虎拜太平恭賀慶雲延

天德庵贈法堅老釋

銀臺金闕夢中如弱水蓬山未必虛所謂真仙無則  
已倘非茲土更何居星旗彷彿雲深處天樂依稀月  
上初我亦三生餘習在丹成重過遠公廬

江陵壁上次 先祖樗軒先生韻

三榜三魁在一年教場新曲鷓鴣天神功往蹟猶雲  
表王事來孫又海邊沙岸細鳴棠葉雨野橋輕颺柳  
絲烟依然玉節經行路耆舊無人問謫仙

別驪州尹牧伯

驪陽太守醉登舟渺渺晴波接上游趁月鍾聲來遠  
寺渡江帆影落層樓人回洞府言逢虎吏散官庭見  
下鷓最是終南長在眼不關情處亦生愁

送寧遠楊判官萬古之任

碧梧流葉報秋期壯士辭家劍獨隨王事陽關多舊

白洲集卷之七  
三十一  
識 主恩香嶽富新詩危譙倚月寒生柝列幕臨江  
夜卷旗聞說向來推轂意爾曹何幸得同時

別居山金督郵

地粹

海天寥濶嶺雲平關月蒼茫隴水鳴自是征人皆下  
淚可憐游子若爲情沙邊首宿荒村路笛裡梅花出  
塞聲爭道此行還雨露夢臣雙眼待君明

挽玄翁申判書夫人

玄翁申  
公欽號

配德尚書百祿宜清江門範冠當時平陽貴主調甘  
旨申國夫人儼內儀不待湘龍雷雨起偏傷完鳥死  
生離孤魂定與春光返故宅櫻花月滿枝

挽金清州

琰  
改葬

喬山回首碧無言東市悲風畫爲昏爭道永寧猶截  
髮敢論昭伯得還魂重恢蒼籙千年運一洗丹書萬  
古冤禮盡哀榮無復憾九原收淚拜君恩

早朝大明宮

月課

三殿金扉闢曉涼九街銀燭絢星芒晨光乍辨凌雲  
榜和氣微薰夾路香壓帽繁花紅氍露側爐流月澹  
如霜詞臣別有新詩料昨夜鶯聲度建章

挽永昌大君遷葬

江海茫茫島嶼昏楚招何處返孤魂天晴上苑曾遊

地春滿東朝舊閉門人事向時惟涕淚 主恩今日  
復乾坤丹旌莫近王灘路松栢喬山白露繁

別金書狀地粹

南方才子北方遷一別無端近十年白首還家重會  
面青雲得路又朝天蓬壺隱約驚波裡齊魯微茫落  
照邊想得春來旋使節對人先詫記行篇

挽呂清州祐吉

東方候騎盛如雲朱紱新看老使君誰道一春消息  
阻便成千古死生分朝班曉渴思聯步湖社清樽罷  
襲薰想得桐鄉三月化定留遺愛後人聞

次玉堂諸學士韻

詩壘曾誇幾受降病來歌嘯寄南窓探梅學士官爲  
水夢筆詞臣姓是江交義莫論青白眼閑情都付淺  
深缸男兒許與無新舊未必陳雷本作雙

銀臺直廬寄贈許高城啓

樹頭初日媚新晴別院微風暑氣輕傲吏行裝仍勝  
境侍臣啣命且嚴程蓬山桂子秋先落香岳楓林  
雨後明兩地毗應在眼一杯東望爲君傾將有瘳  
行故篇  
之中及

李太史東野氏承曝晒香山之命頰行叩我

白洲集卷之七  
於西庠之寓曰垆之家大人方按節關西出  
巡龍鐵間垆於原隰之暇欲奉晨昏於海上  
千里父子之會誠國恩也子可無一言相贈  
乎是日也風雨終朝街泥如海余亦困於宿  
酒閉門蒙頭而卧太史氏簔笠遠訪致意至  
此余實艷其行而多其意作韻語一篇以謝  
星使無如晒史閑奉綸治屐必仙班趨庭且赴觀風  
地枉道仍尋並海山喚曙嬌鶯官柳暗晴酣蝶野  
花斑自憐濟勝終無分謾說年前八往還  
白洲集卷之七

白洲集卷之八

七言律

金可久德承朝天 御史之行具小酒夜飲為  
別既別成一詩贈之

滿城風雨夜淒淒送客門前聽遠雞浮世本來長合  
散此行何耐遠分携蓬壺隱約三千水城郭依倚十  
二齊一片蘇碑堪共語病夫還欲寄新題

挽青雲君沈公命世大夫入遷葬

爾陵家世敵青陽朝典閨儀稱義方千里晨昏隨遠  
謫十年香火隔他鄉諸孫翰墨聲名早少子山河帶



白洲集卷之六  
一  
礪長想得泉塗悲感溢紫鸞新誥最恩光

送趙監司存性出按關東

蓬山羽客髮如霜不信仙鄉勝壽鄉故喚耆英為道  
主共留餘景闔身強棠花細雨鳴沙淨桂樹清風洞  
府香但待行春兼晚賞雪窓唯檢少君方

別洪書狀霄後改翼漢

壯元才氣一時豪萬里浮槎八月濤共說朝京皆慎  
簡獨憐通籍遠賢勞慈闈信息憑魂夢客路光陰見  
鬢毛誰遣病懷頻作惡更慚踈懶廁清曹

別嶺伯李子時

重對江湖舊酒壚百年天地只吾徒纔看幕府英聲  
動早識書生膽氣麓王事出門仍熟路主恩持節  
即名區相思一片三星月不道衡南鴈有無

端午帖居首

細葛香蒲拜賜辰聖朝文物屬重新薰風已扇昭  
蘇化惠雨仍添發育仁佳氣擁來三殿合清陰分去  
四方均誰人謾進江心鏡前鑒由來在軫民

挽沈中書光世

政府深嚴老舍人玉堂清切舊詞臣登筵醞藉談經  
細請著縱橫抗疏頻病滯殊鄉惟涕淚夢回行殿尚

精神風霜向日驚心地忍說新阡近瘴濱

挽林廣州檜

白日都門劍色高男兒七尺等鴻毛平居默默知何  
狀亂後堂堂見此曹幾處綿蕪來義舊千秋棹楔有  
恩褒回思把臂臨江別獨望南雲淚滿袍

沈生歌兒悼語

病後東陽減帶鈎比紅新詠寫新愁梨花曉夢雲俱  
散桃葉春歌水自流誰遣微風開繡幕空餘明月照  
粧樓多情最是江南草血淚遺痕點點留

送吳肅羽朝天

不分夷險逐年勞政坐才名特地高未忍門閭垂鶴  
髮敢論身世勝鴻毛文星遠耀開昏裊紫氣先驅帖  
怒濤待得周庭聞樂後及春回節荷恩褒

挽白玉峯光勳內

永和書法盛唐詩羨對聲名振一時泉下幾年分劍  
怨掌中它日隕珠悲傳家舊業仍湖外隔世新阡又  
海涯遙想橘林寒食兩柳車悽斷唱哀辭

挽李二相尚毅

金榜重呼第一名汝南家世漢公卿石君晚節猶無  
恙丙相當時已有聲接屋朱輪兄弟貴滿庭瓊樹子

孫榮憑床片語成長訣欲奠單盃淚濯纓

挽林監司

愔

骯髒形骸放達心斗南家世錦城林時危許國金橫  
帶歲暮還家雪滿簪掌裡雙珠殊可念匣中孤劍會  
相尋松堂妙法平生酒哭向青山不復斟

別通信副使

昔在仙槎望外洋火輪昇處想扶桑風檣瞥瞥流千  
里雲嶼微微僅一芒誰向此間還北路莫教他歲滯  
他鄉懸知返節還朝日漢水烟花爛熳香

別通信書狀

仙槎初出紫薇垣八月濤聲滿海門周禮職方何處  
盡秦時遺跡此應存清風灑灑蔣卿幕秋草萋萋徐  
福村想到扶桑新繫馬赤雲堆裡看朝暾

奉寄襄陽趙使君

緯韓

風海漫天雪嶺危謫官消息鴈來遲纔乘桓子新駘  
馬遶着山翁舊接羅歲暮羈愁懸闕夢月明佳興倚  
樓詩徵書會趁薇花發直送仙郎到鳳池

送崔光山

陳情一疏感 重宸南縣新除輟從臣蓬島烟霞辭  
禁直杜陵花竹近鄉隣年功報熟休增賦兵籍稱虛

罷束民君去定應宣 聖旨滿城歌舞祝堯人

次東淮韻送通川李使君 并男

千朵芙蓉萬頃銀繡衣曾過海山春棠花夾路交相  
暎鷗鳥隨人近却親勾漏鍊丹徒謾說使君飛鳥想  
傳神翩然更欲乘風去樓上孤吟是洞賓

仙臺日月耀金銀洞府烟霞別段春不但稚川為令  
宰更兼潘岳奉慈親螺鬟入望應添興驪唱催還各  
損神况復羊曇偏有感典刑何啻對元賓

覺寒賜裘帽 月課擬作

饕雪宵侵氍帳單 聖心先軫露師寒恩言不啻推

衣惠喜氣爭如挾纊歡着去輝增龍虎節戴來榮掩  
鷄鷄冠從知剗廓殊勲業只在人君一念端

書堂餞席延平相公與綾城君具公 宏携酒出

臨醉後書一律謝之 時以安胎  
使向湖南

繁花弱柳媚晴春簫鼓臨江送遠人並直鸞臺雙學  
士中興麟閣兩勲臣蓬山勝事聞前輩范蠡清風見  
後身退筆昔曾叨賜暇醉來還愧吐華茵

挽鄭翰林 松

滎陽家世盛簪纓谷口聲名動漢京喜氣曾誇金榜  
拆驚心催報玉樓成孤兒比却三珠少短歲方之列

宿羸最是鍾情無限淚共誰聯步進延英

別鍾城李都護 景容

浙浙山風曉撼樓酒醒寒氣襲綿裘仍思絕漠驚沙  
裏想見孤城大海頭誰道故人經歲別更兼游子望  
雲愁呼鷹躍馬男兒事只為明朝判去留

別黃州南判官 銑 之任

使君終歲版曹郎朱墨叢中只辦忙何似城池稱壯  
地更兼樓閣擅名鄉呼鷹健卒羶為帽抱瑟嬌娥繡  
作囊莫說品泉非第一藥爐遠有煮參湯

挽曹承旨 友仁

分臺新詠感蒼天文罔當年素節堅 聖主龍興宣  
召急清朝鵠立荷恩先非關骨體違時操自是溪山  
有夙緣千里徵書生死隔只應緘淚到重泉

送暗行 御史嚴敬甫 惺

分臺 御史玉堂仙 天語親承侍講筵不待華星  
臨道路先看惠雨遍山川閑過野寺宵聞磬借宿江  
村曉喚船各問歸期花發後較君多少紀行篇 時余  
使光山故  
末句云

次趙梨園 璞 韻

居士柴門山雪深渭南詞客夜相尋輕風入幕頻更

白洲集卷之八  
燭斜月當窓已見參到處酣歌吾輩得任他榮落故  
人心陽春和曲休言寡一斗千篇愧翰林

送高君涉之任興陽

縣城如斗渺天涯學士分符此一時身似鷓鴣南向  
遠夢隨鴻鴈北來逢蠻烟夜濕寒梅綻海旭朝烘露  
橘垂饒得新詩酬物色驛筒頻遞慰相思

奉別尹都尉新之安州迎慰之行

沮西春色爛烟花都尉風流溢路誇虛負一生華國  
手暫勞千里候仙槎臨江勝席繁粧開暎壁新詩醉  
墨斜最是三清樓上月夜深來照碧窓紗

辭朝以蘇時奉命

曉出銀臺拜 玉宸塞城迢遞大江濱天題封下金  
泥濕 御藥分宣雨露新萬里虬髯皆鼓氣一方詞  
賦孰超倫微臣報國惟筋力不恨年年作遠人

留別席上諸公

驪駒在路僕夫催落日河橋勝席開四海艱虞仍出  
塞百年行役又登臺憂時謾有封關意奉使慙無喻  
蜀才珍重諸公瞻送遠不堪臨去更遲回

次新安丁令宰好怒制勝樓韻

行人遙指定州城外孤峯劍削成中有使君新建

白洲集卷之六  
閣向來游子幾班荆危譙倚月笳聲迥古棧參雲鴈  
陣橫玉事出關秋已半欲從高處望神京

題統軍亭

悲笳一曲古涼州徙倚孤城百尺樓江外青山依舊  
色樽前黃葉又新秋秦關仗節行人至燕市懸金杜  
士收指點孤雲何處落帝鄉消息更悠悠

龍鵲山次汝固韻

天半樓臺別界開兒孫列立海邊山盤雲路却容聯  
騎削鐵城皆倚絕巒曠世恩褒前日至暮年征戰幾  
時還蓬萊殿裏平安火只為班超在玉關

次澤堂韻贈新安丁明府

碧梧黃葉報新涼遠客逢秋思渺茫十日驅馳猶塞  
路一樽離別即河梁還嫌寶瑟朱絃咽莫詫鮮粧錦  
帶長地主千金應謾費古來誰見小姑郎

別安東府伯沈公

詒

九街銀燭共鳴珂漏院清霜幾滿靴江海一麾還悵  
望人生五馬亦蹉跎朝衙判筆無留牒夜宴登樓擁  
醉歌堪笑着鞭吾已後向來乾沒較誰多

寄子時

隴上行人逢驛使林川太守寄書來親知落落各星

散關路迢迢無鴈迴歲暮相思百感集風霜滿地孤  
芳摧勗君努力且加飭不待青春青眼開

附次韻

清秋別夢散銀臺獨伴霜鴻萬里來垂老乾坤青  
眼在窮愁江海素書迴梅花破臘初堪折竹樹經  
寒半欲摧遙想長安行樂處故人尊酒為誰開

觀海

送趙正璞謫牙山

歲暮寒侵逐客衣一般湖路異前歸芬華久付邯鄲  
枕明月重輪采石磯可是窮愁堪著述更將何語白

庭闈平生不負揚臨賀忍淚都門對夕暉

別關東崔方伯

現

一棹飄然上水船病臣行色 聖君憐華銜暫輟承  
明直新 命先從嶺海宣地接鄉關仍驛路山名楓  
岳又秋天靈源洞裡尋真錄想見丹書剩一仙

挽晉原府院君柳公

根

華國文章扈 聖功八旬遐壽貳公崇晉朝清潤元  
相並洛社風流較孰雄病滯孤舟移客枕夢隨流水  
繞 行宮千官從蹕還京日獨送丹旌溯峽中

別再從兄閔高山

後騫



廣文三載十遷居家具何曾滿一車湖縣新除差可  
慰男兒壯志未應舒山川信義堪延賞簿牒無多可  
讀書最是弟兄相憶處小塘春草欲生初

送聖節使邊僉知應璧

秋來離思劇無聊獨夜官齋井葉凋燈下題詩尋驛  
使樽前携手隔河橋連雲秀色三山島撼海寒聲八  
月潮想到金華勞問訊九江家世冠中朝

挽西平府院君韓公浚謙

先朝恩眷老成臣 聖代尊榮國舅親德量恢恢千  
頃海和風藹藹一團春聲華自是文章伯節鎮誰非

部曲人幕府少年知遇感獨絨雙淚大江濱

寄謝北伯南公以恭

聖朝方岳老詞臣冠冕青春隔 紫宸高義敢忘生  
死際苦心偏為別離頻芳絨遠帶關山雪彩筆仍隨  
驛使塵咫尺朱門常駐馬幾時呼酒醉華茵

請郡後次東岳韻出宰南陽時

二年喉舌再周章每趁晨鐘入上陽常侍倦來歌自  
苦承明辭去病還長郊畿地近朝京路魚稻秋宜並  
海鄉只是殘生仍戒飲十千官釀喚誰嘗

附原韻

三十天官舊侍郎新除不是漢淮陽竇家仙桂連  
枝秀謝宅春蘭奕葉長履盛自生分虎計投閑能  
占卧龍鄉懸知合浦珠還日報國初心見孟嘗

十日重尋一草堂新詩句句孟襄陽綠簑風雨蒼  
山遠玄鳥星霜白髮長別夢幾驚關塞路歸心常

憶水雲鄉逢君莫恠慙謝險阻年來我備嘗

天章路中逢兩口占絕句來示余曰樹遠人家隱  
隱沙平溪水涓涓青蒨綠簑風雨依然西塞山前  
聯故韻云

次樂全韻

東岳

獵罷東門信馬歸數村花竹映山扉閑來几杖俱無

恙亂後圖書半覺非野馬游絲看物態飛鴉落日任

天機旁人莫道傳筒數江海宅時尺素稀

附原韻

賦就歸來未得歸端居祇合掩門扉酒因病肺樽  
罍遠書為移家卷帙非却悔半生經世故但期垂  
老葆天機下簾且試澄澄水漸覺人間事到稀

樂全

次汾西韻

使君新詩短且長客子故態醒仍狂乍見官池掠海  
燕已聞野草鳴寒蟹滿眼白醪不無分登盤紫鱗還

有腸重陽此去幾多日縱對黃花誰對觴

次樂全詞伯見寄韻

滿眼榴花不賦詩此翁於事百無為元嬾杜預書成  
癖却笑揚雄字識竒睡後雲山迎爽氣興來池水弄  
清漪多情公子時相問照室華牋筆似羲

次觀海韻

臘前風日政淒淒官况蕭條大海西翰墨全拋才已  
退文書欲判眼先迷朝衙罷後留僧語暮獵歸時見  
鶴棲最憶隋城寒雨裏一尊携手下山蹊

別高原李使君

志定

漏盡重城宴罷歸曙窓殘燭淡無輝醒來已覺河梁  
遠別後何堪信使稀嶺路淒風吹斷角海門寒雪灑  
征衣丁寧記得臨分語歲暮襟期兩不違

送進香使洪同知

露

北極星辰改紫樞東溟波浪隔蒼梧孤槎奉使春將  
暮一瓣燒香歲已徂淚盡悲風吹玉座夢回流月遠  
金爐遙知奏事蓬萊日共指三韓上大夫

春日郡齋病起悄坐有懷浴中諸君子口占却  
寄

槐花欲動杏花殘江雨初晴春色闌但使官厨新釀

白洲集卷之八  
十二  
熟育教漁社舊盟寒端居盡日仍多病強飲佳辰亦  
少歡最是今宵三五月十分清景共誰看

送閔侍郎聖徽朝京

按使還朝且一年外臣京洛信難傳春來幾作相思  
夢病起仍題遠別篇悵望河橋傾蓋地寂寥江郡落  
花天男兒報國須材力不向明時歎獨賢

大部島客館

雲海蒼茫澹月華暮潮初落見平沙鳩鳴小塢深深  
樹鴈唳長洲點點花物色依然泉客室人烟宛似洞  
仙家分明此日三山勝自是平生夢裡誇

靈輿島客館

船頭遙祭水神祠爭唱橈歌日落時孤嶼點燈烟漠  
漠小堂欹枕夜遲遲童男採藥何年過星漢乘槎此  
路疑浪迹人間游賞遍海山深處又題詩

醉次汾西韻

醉筆縱橫落數行殘花故故近盃香鶻啼古樹千在  
怨月隱空簾五夜涼最愛佳賓填址海不妨游子戀  
東床江郎病去才情退敢向曹劉目短牆  
太守庭外槐柳行太守庭中花草香前山漠漠蜀魄  
苦小閣沉沉官酒涼萬里江湖常伏枕一宵風雨又

連床酣來不覺更籌盡星斗闌干欲隱墻  
座中皆是列仙行星斗霏霏花霧香酒興倦如官燭  
爛宦情閑似夏雲涼歡同詞客揮銀管醉憶嬌娥捲  
象床最是西川饒蜀魄夜深嗚咽繞東墻

鷹巖雨中口號

急雨東來雷一鳴陰雲漠漠四望平虛無不辨瀟湘  
色浙瀝時聞滄海聲野客披簑行立久漁舟蕩槩往  
來輕歸途莫說衝泥苦天際微明欲放晴  
綠樹深深黃鳥鳴柴門近海暮潮平遙添草際霏微  
色靜聽窓間滴瀝聲官酒未消山靄重袷衣仍透水

風輕天公戲劇還多事一半陰雲一半晴

次朴弟仲連韻

縹緲高臺面水開百年豪舉我曹來長林偃伏沉沉  
雨絕壁橫蟠隱隱雷鷗外明霞分一縷席邊驚浪涌  
千堆傍人不識行春意錯道登臨戀酒杯

王母臺

春來長憶故園梅日暮獨登王母臺臺上蟠桃幾番  
熟西飛青鳥何時迴蒼松陰落研光帽白雲影浸流  
霞杯空裏如聞紫簫曲萬里颯颯天風來

次谿谷韻示子容

退食逶迤出殿遲講筵朝夕贊文思應傳蜀客賢臣

頌共和韓公聖德詩吏部明揚符物望廟謨竒正合

時宜功名勉力須公等千載難逢際會期右寄大學士

滎陽消息近來遲獨夜江城有所思何日留連何處

酒幾人酬唱幾篇詩中年聚散相知盡末路襟懷此

老宜最是流光催別恨碧梧新月又秋期右寄崎翁聞有義溪

之遊二三句及之

農家六月雨偏逢天意寧無慰 聖恩志喜亭中刺

史記祈靈壇上從臣詩良田已見黃埃起瘦地還應

白粟宜民下亦知經用急索租惟願少寬期右答民章

使君閑興與雲遲佳處纔回靜處思搃為無民稀見

牒又因多病懶吟詩秋初赤柿沉仍熟雨後青葵煮

最宜飽食一年慚少效荅恩空有寸心期右自家紀實

燈前細酌報更遲郭外春遊入夢思一卧滄江仍抱

病每尋孤寺獨題詩河陽百里看花遍彭澤三畦種

秫宜欲趁秋風理歸櫂烟波極目渺難期

附原韻

午榻微涼破睡遲故人書到慰相思誰知牒訴裝

懷地却有彈丸脫手詩翻覆可堪看俗態酸醜元

不適時宜琴堂定奏峩洋曲借問何人是子期

欲和新篇下筆遲  
羨人為政入長思  
偶同光祿一麾去  
應賦東陽八詠詩  
簿領勞君身已苦  
騷壇推我大非宜  
秋風屈指無多日  
河漢雙星會有期  
當關呼起懶常遲  
中散風流是我思  
洛溪閑居曾有賦  
漳濱卧病幾題詩  
名途叵耐羣猜併  
俗樣都無一事宜  
知有黃公酒壚在  
興來聊復赴幽期

谿谷

附次韻

勝日逢場每恨遲  
暫時分手費吟思  
夢中尚識緣江路  
朝退纔驚寄適詩  
製錦好看才是妙  
安絃直

與懶相宜枯棋一着君輸我急送如泉肯負期詩忌

實言落語秘之

周南幾載負栖遲  
水竹分明入夢思  
垂老豈知從宦樂  
乞身唯有憶歸詩  
致君堯舜元非分  
厠跡臯夔百不宜  
休遣北山騰誚笑  
暮年漁釣赴前期  
狂言吐口故遲遲  
會意寧嫌戲出思  
昨指常存韓子戒  
觀身老檢杜陵詩  
收名計利知皆誤  
置散投閑分所宜  
何惜借吾山水縣  
簿書無失吏民期

畸翁

遊瀛洲口號

神仙官府玉玲瓏一宿三清萬念空陰壑千年無白日層臺六月有冷風羣山破碎平蕪際大海微茫積氣中伊軋竹輿迷去路隔林僧語小燈紅

謝谿谷畸翁見訪

數畝花田一尺籬野夫多病此棲遲賓筵不勸新豐酒僧卷同酬鄭谷詩世態本來無善相我曹隨處有佳期青山暝色兼風雨惆悵門前各散時

附次韻

東城僻處叩荆籬跋馬還愁赴約遲留客樽空聊置醴對僧吟苦強題詩官身少暇難兼興勝事隨

緣豈問期莫恨古人今不見天教吾輩得同時

谿谷

窄窄柴門短短籬相迎共說盍簪遲語闌韉馬休沽酒棋罷逢僧且賦詩僦屋倘能同里巷杖藜聊復托襟期人生得意忘年在莫恨吾衰子貴時

畸翁

雨足陂塘水映籬小軒清絕下簾遲閑中趣味惟耽睡病後風光不到詩佳客會成終日話韻僧來問入山期歸途定有驚人作興在披簑出洞時

附次韻



白州集卷之六  
十一  
啾啾飢雀噪空籬午榻風輕睡起遲藥罍自憐居  
士病華牋重得故人詩議堂集鳳身虛忝文苑雕  
龍子可期休沐過逢真樂事幸將迂拙托清時

谿谷

江南小築插疎籬病客歸休訝許遲中夜夢魂知  
舊路暮年情事見新詩浮湛却笑爭名日憂樂寧  
忘報國期隱几嗒然收視聽試看香篆欲殘時

畸翁

鄰鷄日午唱疎籬留客山家黍飯遲白雨暎簾堪入  
畫清風滿袖好尋詩誰憐抱病同玄晏自許知音有

子期朱墨數年雙鬢換退才真怯適筒時

附次韻

居士幽居荻作籬客來敲戶出應遲偶然小集緣  
乘興贏得諸公各賦詩伏雨闌風少晴景官閑身  
健即前期詞場唱和朋簪盛穹壤難逢此一時

谿谷

十里烟波白竹籬故園歸計為誰遲依倚處士村前  
路零落漁人壁上詩燕子不來秋欲近榴花初動雨  
如期西江舊事君能記醉睡孤篷月滿時

簡謝靈光朴使君

安悌

長路雍容太守車倦游千里借光華行時不覺身為  
客別後惟將病到家寶篋新裁湘岸竹香茶初摘建  
溪芽題封遠寄情多少絕勝江南驛使花

送龍岡李使君

尚懽

國西三縣儘雄腴從古詞臣鮮佩符多難至今為劇  
地薦賢相繼輟名途喧闐鼓角重關外寂寞樓臺大  
海隅欲問秋來鄉思切鏡湖烟月夢中孤

送鄭書狀

之羽

朝天

雲物淒迷向夕涼病懷憐慄望河梁星宮也日逢仙  
侶玉節何時到帝鄉地近榆關聞鼓角天開華島送

帆檣轅門會奏平遼雅試聽鏡歌演幾章

西湖夜泛次谿谷大學士韻示子容

蘇子休誇赤壁遊天教李郭得同舟漁家酒熟仍佳  
節散秩身閑搃勝流近水樓臺偏占月滿江蘆葦早  
知秋他時指點丹青裏脫帽狂吟是白洲

別運判曹子實

文秀

運臣催漕管西南秩視分臺道屬三萬舶趨期風海  
晏孤亭延眺水雲涵漁舸喚客逢微雨官壁題詩帶  
半酣魚鱗釘盤柑橘熟絕勝郎署只香含

送谿谷左遷羅州

白州集卷之八

十九

白洲集卷之六 十九  
風雨蕭蕭晚作寒別懷懨懨對秋山平居謾說歸田  
好老去方知行路難多病政愁炎瘴毒倦遊無賴水  
雲閑江潭處處靈均草只佩文無莫佩蘭

復用前韻寄谿谷

落葉成堆擁壁寒櫪空羸馬聳三山兒貪梨栗徵求  
急僕倦薪芻折制難收圃滌場元少入瑾扉修竈也  
無閑何人錯說長安樂剖竹由來勝握蘭

謝新溪閔使君

萬疊青山擁縣居一溪流水繞官除田間不見催租  
帖案上空留乞藥書秋晚洞門逢獵騎日斜村路過

樵車公餘自有逍遙興漁釣還應憶孟諸

挽李承旨民歲

漢庭才子盛如雲詞賦翩翩孰出羣枚叔早時遊大  
國所忠它日檢遺文三年海邑鄉書隔十月銀臺禁  
直分最是灣行相贈錄一回看去一懷君

次聘君寄示韻

午倦勾添飯後眠楚鄉棲息夢依然震翻放逐歸何  
日屈子行吟賦幾篇多病要求京市藥遠書猶帶瘴  
江烟回看一點爲飛處此夕還應到海邊

附原韻

盡日瘴風撼客眠異鄉歸思正茫然連天但見黃  
茅瘴下里誰和白雪篇北極朝廷高紫氣西關兵  
馬動烽烟塵埃眯目身先老夜夜龍光傍斗邊

梧窓

口號

霧雨濛濛日色昏仲冬時候仲春暄偶然舒慘觀天  
意未必灾祥驗物論鴻鴈不傳霜後信梅花欲動臘  
前魂半生漁獵真成病悵望江南酒熟村

別李書狀志賤朝天

曉起西樓月半規九門如海曙鍾遲應知銀漢乘槎

容政是瑤墀奉宸時郊外豈無瞻送地燈前先寫贈  
行詩君歸定奏平遠雅拭目明光起草姿

別鄭紫元朝天

狀元文采照青春雅望朝端第一人素節豈隨夷險  
變故情偏惜別離頻西浮萊海波濤穩北望榆關氣  
象新爭道壯眸宜健筆岱宗秋色闔嶙峋

別金溝崔使君尚謙

離合悠悠十載間風流不減鬢先斑南鄉本自多親  
舊東里其如少往還望裏不堪看竹興公餘應有對  
棋閑憑君記得曾遊處村外長橋縣後山

次東岳韻

文章千古盛茲辰前輩風流仰後塵  
飲餞都門留幾日題詩官閣寄何人  
團圓定有新知樂懶慢須憐舊態真  
報政歸朝知不遠暮年還往敢辭頻

附原韻

白首青雲夢隔辰濁泥誰料在清塵  
雪中兼挈一壺酒海內共推千載人  
却怕醉言譏世偽須憐豪氣出天真  
憑傳鄭李促家姪別後詩筒唯待頻

東岳

次谿谷大學士元日早朝寄示韻

絳燭玲瓏黼座明九門傳鑰罷嚴更  
庭中瑞霧香烟合闕角踈星玉斗橫  
法仗初排鷓鴣序仙韶欲奏鳳凰鳴  
微臣幸沐衢樽化擬綴新詞頌太平

次觀海韻別關東申方伯

鸞書新命出螭頭擁節關東二十州  
兩世承恩真盛事一方專制必名流  
棠陰宛是趨庭日楓葉依然滿壑秋  
試向靈源尋舊跡綠苔巖畔記同遊

挽金沙溪先生

平生自幸望門墻和氣曾薰滿座香  
用舍實關時顯晦去來應係道存亡  
孤忠禁闥風雲隔舊業山林日

月長忍使斯文終寂寞百年庭訓有青箱

別湖南按使

帶礪山河第一功節旄湖海舊元戎文章早得傳神  
妙志業初知蓋世雄共被書齋如昨日對樽漁社樂  
秋風中年此別偏懷惡須折梅花數適筒

簡寄關西伯閔士祥

亂後西關歲月多向來形勢近如何樓臺盡作屯兵  
地絲管翻成出塞歌海島安危都督府中魚得失大  
凌河應知按使青春鬢捻為憂時一半皤

別淳昌林使君

端

使君雙鬢黑如鴉再向名區領物華碁局定隨谿上  
竹藥爐應試雨前茶筍輿鳴處春尋寺笳鼓聞時晚  
罷衙仍憶昔年登瑞石至今魂夢統烟霞

別松都經歷金自珍

南重

宴罷江樓並馬歸至今風露在人衣中年離合憐同  
病末路行藏已息機積翠排空叅氣象殘花戀樹殿  
芳菲雲興寺裡懸燈夜不信人間有是非

送完尹李子時

侍臣冠珮日相從宮殿春雲五色濃佳句未酬青玉  
案御書常折紫泥封朝班密邇隨天仗夜酌淹留

到曉鍾何意七年重接武每將湖海付元龍

因舍弟聞觀海諸詞伯復演前韻敢效頻四疊  
才彥逢時各景從近臣偏荷 渥恩濃綸宣內府騰  
生紙奏到中書割副封殘燭影迷溫室樹早鴉聲散  
午門鍾何人獨唱陽春曲第一雲間陸士龍

聞說蓬山二客從至今嵐翠滿衣濃纔經西掖三冬  
直遽輟南州百里封葉縣謾誇仙令烏爰居虛饗魯  
門鍾春風已暖桃花水一蹴天門點額龍  
名途摘埴欲何從山色爭如世味濃同舍忽成秋葉  
散故溪長憶水雲封端居寂寂開新釀倦夢依依聽

舊鍾門外樹陰千頃綠殿頭猶記舞槐龍

阡陌無人杖屨從閉門終日黑甜濃牙籤始整羣書  
帙塵匣初開舊硯封數畝桑麻尋別墅九街燈燭隔  
晨鍾關心最是窓前竹雨後斑斑長籜龍

次睦承旨叙韻寄題陶辭帖後

絮飛春去兩無期深院鶯歌漲綠時多病未尋湖上  
夢憶君惟檢省中詩芳醪已報前村熟新竹纔從後  
苑移且待山郎休浣日故人佳會莫教遲

贈別澤堂還扞城任所

使君文采自仙寮雙鳥東還葉縣喬瑤琢蜀山新鑿

路尺量秦海欲成  
橋螭映日紅初爛  
庭草經冬綠未凋  
最是昔年將命地  
月樓笙鶴夢迢迢

銀臺稷帖次清陰院相韻

雙鬢蕭蕭冷玉簪  
七年三八省門深  
周旋向日猶差健  
羸病經春轉未任  
紅藥影邊歸院夢  
紫薇香裏對樽心  
官曹聚散元無定  
詩卷他時費獨尋

睦承旨稷帖又次清陰院相韻

九街風露滿衣簪  
曉入銀臺燭影深  
禁裏官曹人共艷  
病來筋力我何任  
杯筵不復追前事  
車笠終須保此心  
珍重畫圖他日面  
絕勝陳迹夢相尋

挽李延平貴遷葬

精爽何曾闕九泉  
音容已似隔千年  
誰能獨奏排雲叫  
不復孤誠向日懸  
中夜尚勞霖雨夢  
臨朝為輟蓼蕭篇  
忠魂定恨終南遠  
歸櫬遲回渡漢船

蕩春臺口號示汝固子時德餘搗史會作

東觀曾紬石室書  
一官前後十年餘  
編摩敢擬追班馬  
考閱多慚辨魯魚  
萬杵砧聲兼水響  
數村籬落似山居  
他時洗草重修稷  
免使流傳盛事虛

歸路次舍弟寄贈韻

野橋齊馬到翩翩  
勝集春臺翰墨仙  
秘錄幾紬金櫃



史新題頻染彩花牋  
屯雲暝色延山徑  
過雨寒聲起石泉  
從此漫郎無一事  
興來惟向酒家眠

銀臺直廬奉知申事清陰兼寄東淮

春幡纔下紫宸宮  
正月餘寒雪未融  
十疊屏深還似水  
六銖衣薄不禁風  
偏憐寶鴨香頻歇  
最惜金瓶酒易空  
忽覺簷間禽語緩  
日輪初轉上林東

去年非分佐南宮  
和氣曾薰席上融  
判牘共消春省日  
行旌俄指雪山風  
清班更愧鷓鴣聯  
序往迹還同鴈印  
空成集一官真盛事  
先生秀句滿天東

斗柄初回木帝宮  
即看春色滿城融  
前村漠漠催花

兩深院依依劈柳風  
早覺榮枯都是幻  
從知色相寺成空  
年來潦倒真堪笑  
小築何時出上東

多生結習藥珠宮  
謫下人間道氣融  
並直金門深似海  
爭瞻玉樹迥臨風  
班聯咫尺三台近  
筆落須臾萬紙空  
磚日欲斜牋奏少  
坐聞春漏響丁東

千秋遙賀少陽宮  
萬里精神咫尺融  
統榻香烟縈細霧  
趁班環珮響輕風  
臚人唱罷三階靜  
仗士回時九陌空  
自是梯航同遠邇  
不關滄海隔西東

右千秋演禮時作

瀟湘姿入洛陽宮  
羅帕分珍寵渥融  
始摘幾枝溥

白露纔傳一座散香風懷歸鶴髮偏知感投擲金盤  
未覺空同省唱酬誇盛事共瞻奎壁掖門東

右題李承旨尚輔黃柑帖

附次韻

平生章甫厄儒宮脚底常思徧結融病渴遂霑金  
掌露遠遊仍隔閭園風青山黃髮去未去石室雲  
臺空復空早晚羣仙問我處蓬萊西畔海天東

右次謫下人間之作

瑞節重回太子宫祥光喜氣想融融芝函去歲馳  
專使綿繇今朝襲古風漏刻盡辰排御仗鑪烟噴

數鵲春空百年慶會龍池水正似王心萬折東

右次千秋演禮之作

清陰

蕊籠佳氣擁三宮雨露無私日月融花覆掖垣開  
小霽香分講席引微風清朝封事應全簡令節芳  
尊也不空公退徑須朝相府沙堤直接上林東  
時時歸夢到禪宮清水明燈想法融曲沼波生寒  
食雨小園春媚妬花風機鋒藏盡諸緣了韻滑消  
來萬慮空垂晚恩休栖息得數椽要結祗林東

東淮

敬次李承旨尚輔修一賜柑及老之作

炎方苞實獻丹墀近侍均霑雨露垂聯璧兩朝偏感  
激雙親大羞拜恩私流傳定使臣鄰聳歌詠終為藝  
苑奇接武登庸須及早一家忠孝 聖君知

寄谿谷

小園新綠恰藏鴉屋角蛛絲罥落葩世味悠悠身已  
倦年光忽忽鬢先華政當辰日須移竹為近青門欲  
種瓜聽說河豚初上瀨且携苓箸踏晴沙

附次韻

詩殘濃墨字翻鴉妙語真堪配正葩老去此心都  
變化春歸何處覓韶華早知浮世身如夢難得仙

翁棗似瓜却羨東屯每  
江沙

谿谷

別金晦汝迎慰使之行

九年西海斷仙槎極目腥塵薊北遮儀漢官應感  
慨星從天市倍光華宣綸喜過鯨濤險候館驚非鴨  
水涯謾說將迎惟束幣不妨餘暇壁籠紗

次湖伯李直夫憶史局舊遊無字  
廣寒新墨之  
作

一愛清冰映四筵當時按武摠詩仙觀風乍阻青綾  
直闕歲初傳白雪篇報政後膺宣勅召檢書須續對

壯眠賡吟莫恠才情退老學今同逆水船  
玉杵寒聲撼玉樓玄霜碾處彩華流  
九同上谷一應別西得中山價更優  
驛使傳筒看意氣詞臣起草見  
風威一生註易須神助數滿河圖不復求

別東岳朝天

錦繡心肝一語謫仙豪氣少陵詩  
山河保障重臨關寒巡守特簡時  
獨冠兩朝諸學士一札一代太宗  
回天自有千句筆早奉鸞書下赤墀  
西山望碧嵯峨燕地風烟接玉河  
白雪淒空餘古迹皆一其廢尚悲歌  
文章四海知音少意氣千秋攬

涕多此去縱觀天下勝一方  
斲繫奈吾何

別長洲楊使君

萬古

釀雪寒陰閣早春病懷離思倍愁人  
張燈看奕還無興拈筆題詩豈有神  
簪笏本來妨傲吏江山隨處屬詞臣  
白沙汀畔金沙寺一洗籠紗滿壁塵

秋日箭郊示樂全

落日孤烟青草磯晚涼微雨綠簑衣  
分曹共博聊為戲乘興重來且莫違  
漢水樓臺看縹緲廣陵村落望依  
依倚平生此樂忘人老我病猶能一  
醉歸

別江陵府伯睦湯卿

大欽

蕩漾蘭舟放彩毫風流不減少年豪滄洲逸興仍癡  
館碧落仙郎本水曹東蹴蔚陵冰海潤北連楓岳雪  
山高遙憐歲暮看雲恨官路蒼茫鴈使勞

次贈程副揔龍

幕府文書屬望勞河南家世擅名高雄圖破浪孤颿  
劃逸興凌雲大筆操佳譽已聞登刻薦奇功行見降  
綸褒山城駐節臨清漢氣壓陳樓百尺豪  
橫海樓船擁節來扶桑繫馬志雄裁虞卿白璧新承  
幣郭隗黃金舊筭臺歲暮淹留江上寺天涯物色臘  
前梅懸知一箭遼城定幕裡何人勒石才

別奏請使洪汝時寶

金榜曾題第一名少年麟閣主勲盟朝廷禮樂須天  
子使价才華揔月卿碣石晴臨滄海濶岱宗秋望白  
雲生登萊自是觀周路試辨泱泱大國聲

別成川金使君瑄

巫山十二沸江流形勝關西第一樓神女相逢那待  
夢仙家少別幾經秋朝天麟馬今何在乘漢星槎不  
復留想得使君新上府滿城歌吹古涼州

挽李同知惟侃夫人

天上神仙莫謾誇人間壽福更誰加承恩父子三金

帶積慶兒孫萬石家四節歌鐘無旨漚九重色壓倍  
光華年來未展升堂拜忍向南阡哭素車

挽青雲君沈公

命世

中興勲業貳卿尊冠冕青陽世德門白玉照人裴叔  
則黃金結客竇王孫琴瑟零落經年病藥物便蕃抵  
死恩最是鄉山千里隔九原應有未歸魂

挽鷄林府院君李公

守一

山西豪氣濟南風弓馬詩書領略同密勿台司須遠  
筭雍容憐閣自元功平生部曲三邊壯晚節閑居四  
壁空好武能文皆有托福門餘慶到無窮

挽錦洲君朴大觀

姓

清時遭遇少年勲曾草行封應製文敢直特為餘事  
耳通明不愧古人云長羸只恃神逾王早貴常憂世  
空聞自是彭殤同一幻欲將斯語慰尊君

別沈源之

之源 赴永川

陳情一疏感精誠近侍新誇五馬行自是 聖朝推  
孝理非關禁直厭承明清宵北望星辰隔滄海東臨  
瘴霧生聽說樓臺堪嘯傲定留住佳句續宣城

挽吳叅判

百齡

尚書文彩侍郎賢聯璧清朝望實全兩世傳家雙赤

帶百年遺業一青氈和光益勵行箴際雅量先超毀  
譽邊選部昔曾叨下佐此生慚負屬來篇

別平山洪使君 糞

憐君七尺倦行箴老傍風塵尚崛強小縣功名鸞在  
棘早時詞賦繡為腸長卿慢世仍多病常侍逢秋倍  
憶鄉想見官池芳草歇上游烟月夢蒼蒼

別安東洪使君 靈

少年傷別老何堪五綰銅章四嶺南傲骨未應妨世  
務簡遊非為懶朝叅地連商谷新居近官似桐鄉舊  
俗諳認得分司同此感續名廳壁淚雙含 時洪公之  
伯氏方守

松都而松都安東皆公  
先大夫曾蒞之地故云

別海伯吳肅羽

三路觀風七載間况經浮海客燕關將行不作幾微  
色相視俱非少壯顏簡出宸衷符物望任隆方面屬  
時躋書生拙業真堪笑徵酒逋詩也未閑

別關西伯張顯國 紳

中興方伯今荀羨邊事艱虞屬聖時地望豈惟流葦  
出功名早已古人期丹書鐵券山河壯繡節金章兩  
露私應笑舊遊同甲子手携殘簡鬢成絲

挽金判書 起宗 大夫人

潘輿衛幕荷恩頻天借斑衣塞外春三拜十連巡察  
使重封八座大夫人世間榮落真無憾膝下悲歡足  
愴神聽說掌圍徒步去至今行路盡沾巾

贈馮副揔

馮寄送畫  
竹請詩

萬里仙槎破瘴氛十行宸札爛星文恩涵左海千  
重浪喜結層霄五色雲客舍蒯緱看意氣將軍大樹  
憶功勳名家舊業書香在宅相詞華早出羣  
蠻戕十幅染柔毫慘愴經營意匠勞寫出清風吹渭  
畝狀成烟雨暗湘皋斑抽嫩籜龍鱗細翠擘新梢鳳  
尾高乞與南征橫笛處武溪流水想滔滔

寄舒川李使君文伯

蔡

江南地遠更卑湫白葦黃茅極目愁海錯無多還易  
厭簿書雖簡亦難休清宵迥憶銀臺漏暇日重尋錦  
水樓早信明時容直道四年何事再為州

瑞葱臺

親臨試射時擬製

幄殿崔嵬近斗魁夾城清蹕響輕雷松官偃蓋笙簧  
韻花使催鈴錦繡堆滿月烏號隨落照蘸香宮醞共  
春醅宸情不是耽游豫為軫宗英執勒來

次銀臺壁畫靈隱寺詩韻

東浮萬里鷲山停石塔烟藤上下冥大海平吞吳下



白長天不盡越中青忠臣抱怨空留跡韻釋哦詩孰  
辨形千載照人生氣在可無佳句吊英靈  
五色雲中絳節停上清仙路杳層真鰲身半映波濤  
黑蜃氣常留島嶼青咫尺銀臺真似夢分明羽客共  
忘形從知春日嘉陵畫搃為神遊養性靈

白洲集卷之八

